

***Naalackersuisut siulittaasuata Hans Enoksen-ip Kalaallit-Qallunaat
Namminersorneq pillugu isumalioqatigissutaata isumaliutissiissutaata Katuami
6. maj 2008 tunniunneqarneranut atatillugu oqalugiaataa***

Ullumi ulloq inuiaqatigiinnut kalaallinut persuarsionartuulluni pingaartuuvoq. Pissutissaqarpugut suliamik taama peqqissaarussaatisumik tunniunneqartumik qujamasuuteqarluta nuannaarutiginnissalluta, tassami suliakkiusseq pingaartumik kalaallit tungaanniit ataatsimoorfigineqarluni naammassineqarpoq.

Nunatta oqaluttuarisaanerani alloriarneq nutaaq pileraluttuarpoq, nunattami politikikkut inississimanerata nutaamut ineriartorteqqinnissaanut isumaliutissiissutip tunniunneqarneragut ammaanneqarpugut.

Namminersorneq ornipparput, innuttaasullu 25. november 2008 taasinermikkut akuersippata pisussaaffiit nutaat akisussaaffeqartitsinerulersussat tamatsinnut atuutilissapput. Inuiattut immitsinnut oqartussaaffiginerorusuppugut, taamali kissaateqarnerput uatsinnut pisussaaffiliivoq.

Tamatta ataasiakkaarluta pisussaaffeqartutut misigisimanerulertariaqarpugut, tassami piginnaatitaaffiit kisiisa piumasaqaatigiinnartassagutsigit akisussaaqataarusunnerput killeqarsimassaaq - nammineernerujartoreruna akisussaassuseqarnerunermik piumasaqaatitaqartoq.

Tamatta ataasiakkaarluta periarfissanik ineriartuutaasussanik ujartuinerusariaqalerpugut, ikiorneqarnissaannaq utaqqinagu. Timikkut tarnikkullu nukittuujusariaqarpugut, tamannalu angusinnaavarput immitsinnut piumaffigeqatigiinnitsigut ikorfartoqatigiinnitsigullu. Siulitta anersaavat, nammineersinnaassusiat pinertussusiallu eqqaamallugu upperaara uagut kinguaajusut aamma tamanna angussaqaaripput.

Namminersorneq pillugu inatsit akuerineqarpat inuiattut tunngaviusumik piginnaatitaaffivut akuerineqartussanngorput. Tassami Isumalioqatigiissitap Danmark-imi Kalaallit Nunaanilu Naalackersuisunut, Folketingimut Inatsisartunullu innersuussutigisai erseqqilluinnarput.

Naalagaaffeqatigiinnerup iluani inatsisitigut aningaasarsiornikkullu ineriartoqqinnissamut sinaakkutissiat erseqqillunnarput, tassami nammineernerujartornissatsinnut periarfissagut pisinnaatitaaffivullu erseqqissarneqarmata.

Namminersorneq pillugu inatsit atuutitinneqalerpat inuiattut akuerisaassaagut, tassani inatsisitigut naqissuserneqassalluni inuiaasugut nammineq aalajangiisinnaassusillit.

Nunami pisuussutit iluaqutigineqarneranni inuiaat piginnittuunerat naqissuserneqassaaq, matumani aamma aatsitassarsiornermi isertitat inuiannit pigisassarititaanerat ilanngunneqarluni.

Naalagaaffiup nunatsinnut ataatsimoortumik tapiissutigisartagai maannakkutut qaffasissuseqartillugit aningaasaliissutigineqartassapput, aatsitassarsiornermi isertitat nutaamik aaqqissuunneqarneragut aningaasatigut nammineersinnaassuseqarneq annertusarneqassalluni.

Naalagaaffimmiit akisussaaffinnik nutaanik tiguisinnaanissamik periarfissaqalissaagut, taamaaliornissallu nammineq aningaasatigut nammallugit pisinnaasarpullu naapertorlugu aaqqissuuttalissavagut.

Kalaallit oqaasii Kalaallit Nunaani pisortatigoortumik oqaasiulissapput.

Minnerunngitsumik Namminersorneq pillugu inatsit akuerineqariarpat inuiaat kalaallit namminiilivinnissaq pillugu aalajangiisinnaalernerat inatsimmi periarfissiissutigineqassaaq.

Isumaliutissiissut innersuussuterpassuarnik pingaarutilinnik imaqarpoq, tamakkuli tassa innuttaasunik taasititsinissap tungaanut paasititsiniutigineqassapput. Innuttaasunimmi taasititsinissaq aatsaat pissaaq paasititsiniaasoqareernerata kingorna.

Pinngitsoorusunngilanga aamma ministeriuneq Anders Fogh Rasmussen immikkut ittumik qutsavigissallugu. Isumalioqatigiissitamut suliakkiut 2004-mi atsioqatigiissutigigatsigu nunatta oqaluttuarisaanerani immikkut eqqaamaneqartussanngortippetit.

Isumalioqatigiissitami ilaasortat suliamik sukumiilluinnartumik peqqissaarussaalluinnartumillu ullumikkut tunniussa qarput. Kalaallit Nunaanni Naalakkersuisut sinnerlugit Isumalioqatigiissitaq sinnerlugu siulittaasoq Jonathan Motzfeldt siulittaasullu tullia Christian Mejdahl isumaliutissiisummik tunniussa qarneranni qamanga pisumik qutsavigaakka.

Kalaallit-Qallunaat Namminersorneq pillugu Isumalioqatigiissitaani ilaasortat atorfilittallu suleqataasimasut suliassinnik pitsaasumik nersortarialimmillu naammassisaqarnissinni qujanarsuaq.

Suliaq angisooq ukiuni sisamani tunniusimaffigilluinnarlugu ingerlassimavarsi inerneralu kusanartoq tamatta nuannaarutigisinnaasarpur ullumikkut tunniupparsi. Suliassi nunatta pitsaasumik ineriartorteqqinnissaanik kinguneqarnissaa anguniarlugu tamatta sulissaagut.
